

Secondo mi xe nato tuto cusì

Una volta tanti anni in drio in meso al mar iera una picia isola a forma de cuor con tanti montisei, fiumi e patochi. L'erba iera verde e la tera iera de quatro tipi. Là viveva un mucio de gente, tuti contadini. I pasava i giorni in tei campi e a pascolar le bestie: le armente, le piegore, le cavre, i cavai e così vanti. Sta gente, povera, iera convinta de eser sola in sto mondo. No i gaveva mai visto stranieri né altra tera, solo el mar che stava torno de lori. Un giorno la tera la ga tremà una, do, tre volte e tuti in paura i xe corsi fora de le case. Quando un fiol ga cominzià zigar de paura, tuti i se ga vardado, i ga alzà la testa e i ga cominzià a zigar aiuto. Sora de lori de fati, iera un omo altissimo, più grandò dei montisei dell'isola. Iera un gigante che el se ciamava Giovanin. El gaveva braghe verdi, una maia maron tuta rota, la pele scura e i oci maron. El gaveva anca un naso gigante e i cavei curti e neri. La gente impaurida ga cominzià corer de qua e de là. Sto omo vedendo tuta la confusion che se gaveva fato, per calmar la gente el ghe ga spiegà che el iera là solo de pasagio. La gente se ga calmado e incuriosida la ghe ga domandà: "Chi te son ti?" E lui: "Mi son el gigante Giovanin e stavo andando a trovar mia nona." Lori instranidi: "Come de pasagio? De dove? Ma esistemo solo noi... Che nona? Cos te parli?" Lui allora el fa: "Ma come esistè solo voi? Ma xe ancora tante tere qua torno!" E lori: "Cosa? Tere? Ma noi no saveimo... vivemo qua soli de anni e no gavemo mai visto nisun! Che tristeza!" El gigante allora per far contenta la gente el ghe ga parlà del mondo che iera torno de lori e lori curiosi i voleva veder sto mondo ma no i saveva come far. Perciò el gigante che el iera bon de cuor, el ga deciso de iutarli. Cusì el ga ciolto la tera de la Ciciaria che una volta iera una montagna alta tre volte l'Everest e la la ga stivada in meso al mar, tra l'isola e la tera che lori no i gaveva mai visto prima. Cusì l'isola xe diventada una penisola, la nostra bela Istria. Finalmente grazie al gigante Giovanin sta gente ga rivà veder el resto del mondo e conoser tanti altri omini come lori. De allora de fati no i xe mai più stadi soli!